

Aprobada polo Pleno en sesión celebrada o día trinta de decembro de dous mil dous.

ORDENANZA MUNICIPAL REGULADORA DA TENZA DE ANIMAIS DE COMPAÑIA E ANIMAIS POTENCIALMENTE PERIGOSOS.

EXPOSICIÓN DE MOTIVOS.

A Lei 50/1999, do 23 de decembro, sobre o réxime xurídico da tenza de animais potencialmente perigosos, dictada ó amparo do artigo 149.1,29 da Constitución Española, que atribue ó Estado a competencia exclusiva en materia de seguridade pública, asigna no artigo 3 ós concellos a competencia para conceder a licenza administrativa que habilite para a tenza de animais potencialmente perigosos. Ademais, no seu artigo 6º establece que en cada concello existirá un rexistro de animais potencialmente perigosos.

A Lei 1/1993, do 13 de abril, de protección de animais domésticos e salvaxes en catividade impon, no seu artigo 11, ós concellos a obriga de recollida dos animais abandonados, e o Decreto 153/1998, do 2 de abril, polo que se desenvolve a Lei 1/1993, do 13 de abril, no seu artigo 27, obriga a censar a nivel municipal a tódolos animais da especie canina, así como outros que regulamentariamente se determinen. Ó amparo do artigo 3.2 da Lei 50/1999, do 23 de decembro, a Xunta de Galicia aproba o Decreto 90/2002, do 28 de febreiro, polo que se regula a tenza de animais potencialmente perigosos na Comunidade Autónoma de Galicia e se crean os Rexistros Galegos de Identificación de Animais de Compañía e Potencialmente Perigosos e de Adestradores Caninos.

En consecuencia, de Conformidade coas disposicións citadas, e ó amparo da Lei 7/1985, do 2 de abril, reguladora das Bases do Réxime Local, da Lei 5/1997, do 22 de xuño, de Administración Local de Galicia, a Corporación aprobou esta Ordenanza:

CAPÍTULO I.-DISPOSICIÓNS XERAIS.

Artigo 1º.-Obxecto.

1.- A presente Ordenanza ten por obxecto a regulación da concesión e renovación das licencias administrativas para tenza de animais potencialmente perigosos, a regulación do rexistro municipal de animais de compañía e de animais potencialmente perigosos.

2.- Quedan excluídos da aplicación da presente Ordenanza os cans e animais pertencentes as Forzas Armadas, Forzas e Corpos de Seguridade do Estado, Corpos da Policía das Comunidades Autónomas, Policía Local e empresas de Seguridade con autorización oficial.

Artigo 2º.-Definición de Animal Potencialmente Perigoso.

1.-Considéranse animais potencialmente perigosos, no ámbito territorial da Comunidade Autónoma de Galicia, todos aqueles que pertencendo á fauna autóctona ou alóctona, independentemente da súa condición, natureza, especie ou raza á que pertencen, e convivindo no contorno humano como animais domésticos ou de compañía, sexan susceptibles de ocasionala morte, ou lesións ás persoas ou a outros animais, ou de producir danos de certa entidade ás cousas.

2.-No caso concreto dos cans, entenderase por potencialmente perigosos aqueles nos, que concorran calquera das condicións seguintes:

a) Cans que tiveran algún episodio de agresións a persoas ou ataques de certa entidade a animais ou ás cousas.

b) Cans que foran adestrados para a garda e defensa.

c) Cans que polas súas características raciais poidesen ser aptos para o adestramento para garda e defensa, e en concreto, os pertencentes as razas seguintes: American Staffordshire Terrier, Pit Bull Terrier, Bullmastif, Doberman, Dogo Arxentino, Dogo de Bordeos, Dogo do Tíbet, Fila Brasileiro, Mastín Napolitano, Presa Canario, Presa Mallorquín (Ca de Bou), Rottweiler, Staffordshire Bull Terrier, Tosa Inu e Akita Inu. Tamén serán considerados neste apartado os cruces en primeira xeración destes, cruces destas razas entre sí ou cruces destes con outras razas, obtendo unha tipoloxía similar a algunha das razas anteriormente descritas.

d) Cans que manifesten unha marcada agresividade natural ou inducida mediante adestramento, malos tratos ou calquera outro medio. A dita agresividade será apreciada pola autoridade competente da Consellería de Medio Ambiente, de oficio ou logo de notificación ou denuncia, e logo de informe dun adestrador ou veterinario designado para o efecto.

CAPITULO II.- DA LICENCIA MUNICIPAL PARA A TENZA DE ANIMAIS POTENCIALMENTE PERIGOSOS.

Artigo 3º.-Licencia Municipal.

1.-A tenza de animais potencialmente perigosos requerirá a obtención, con carácter previo á adquisición do animal, da correspondente licenza municipal, que se expedirá no concello de residencia habitual do propietario.

2.-Nos supostos previstos no apartado 2.a) do artigo 2º, o titular do can disporá do prazo dun mes para solicita-la licenzia administrativa, a contar desde a resolución dictada para tales efectos.

3.-Nos supostos previstos no apartado 2.d) do artigo 2º, o concello comunicará os feitos á autoridade competente da Consellería de Medio Ambiente, xuntando os informes esixidos no dito apartado, debidamente motivados. No caso de que se dictara resolución apreciando agresividade, o titular disporá do prazo dun mes, a contar desde a súa notificación, para solicitar a licenzia administrativa.

Artigo 4º.-Órgano competente para a concesión da Licenzia.

Tramitado o expediente conforme ó disposto na Lei 30/1992, do 26 de novembro, de réxime xurídico das administracións públicas e do procedemento administrativo común modificada pola Lei 4/1999, do 13 de xaneiro, concederáse a licenzia e o número correspondente da mesma, mediante resolución do órgano que teña atribuída a competencia.

Artigo 5º.-Requisitos e documentación para a obtención da licenzia municipal.

1.-Para a obtención da licenzia municipal será necesario o cumprimento dos seguintes requisitos:

a) -Ser maior de idade.

-Acreditarase mediante fotocopia do D.N.I. ou do pasaporte.

b) -Non ter sido condenado por delitos de homicidio, lesións, torturas, contra a liberdade ou contra a integridade moral, a liberdade sexual e a saúde pública, de asociación con banda armada ou de narcotráfico, así como non estar privado por resolución xudicial do dereito á tenza de animais potencialmente perigosos.

-Acreditarase mediante certificado de antecedentes penais.

c) -Non ter sido sancionado por infraccións graves ou moi graves con algunha das sancións accesorias das previstas no apartado 3 do artigo 13 da Lei 50/1999, do 23 de decembro, sobre o réxime xurídico da tenza de animais potencialmente perigosos. Non obstante, non será impedimento para a obtención ou, no seu caso, renovación da licenzia, ter sido sancionado coa suspensión temporal da mesma, sempre que, no momento da solicitude, a sanción de suspensión anteriormente imposta fora cumprida integramente.

-Acreditarase mediante certificado negativo expedido pola Consellería de Medio Ambiente.

d) -Disponer de certificado de capacidade física e aptitude psicoxica para a tenza de animais potencialmente perigosos, expedido polo director dun centro médico-psicotécnico debidamente autorizado, conforme se recolle nos artigos 4º, 5º e 6º do RD 287/2002, do 22 de marzo.

e) -Acreditación de ter formalizado un seguro de responsabilidade civil por danos a terceiros que poida causa-lo animal, cunha cobertura mínima de 125.000 Euros. Este seguro deberá renovarse anualmente.

-Acreditarase mediante presentación de copia da póliza de seguro claramente detallada ou certificado da compañía aseguradora.

Artigo 6º.-Vixencia e Renovación das licenzias.

1.-As licenzias terán unha vixencia de cinco anos. Trascorrido este periodo deberán ser obxecto de renovación, por período de igual duración, mediante a presentación da mesma documentación esixida para á súa obtención e sinalada no artigo anterior.

2.- A licenzia perderá a súa vixencia no momento no que o seu titular deixe de cumprir calquera dos requisitos establecidos no artigo anterior.

Artigo 7º.-Acreditación da licenzia.

A tenencia da licenzia municipal acreditarase mediante a entrega dunha copia da resolución do expediente administrativo iniciado a solicitude do interesado, e mediante a entrega dunha tarxeta acreditativa expedida polo concello, onde se fagan constar os seguintes datos:

-Número de licenzia municipal.

-Data de resolución do expediente de solicitude da licenzia.

-Data de caducidade da vixencia da licenzia.

-Nome e apelidos do titular.

-D.N.I. do titular.

-Enderezo do titular.

-Fotografía actualizada, do titular.

-Selo do concello.

Artigo 8º.-Revisión e Revogación da licenzia.

1.-Calquera variación dos datos que figuran na licenzia deberá ser comunicada polo seu titular no prazo de 15 días, contados desde a data en que se produza, ó órgano competente do concello ó que corresponda a súa expedición, para que se proceda a realiza-la revisión correspondente.

2.-A perda polo titular de calquera dos requisitos esixidos no artigo 5º. dará lugar á revogación da licenzia municipal outorgada, previa tramitación de expediente contradictorio

A revogación da licenzia dará lugar á perda do dereito á tenza do animal. O propietario procederá, no prazo máximo de quince días, á entrega do animal a un novo propietario que posúa licenzia en vigor. De non atoparse un novo propietario no prazo referido, farase entrega do animal no centro de recollida de

animáis vagabundos ou abandonados dependente do concello, respectando en todo momento o disposto na Lei 1/1993, do 13 de abril, e nos artigos 53 ó 60 do Decreto 153/1998, do 2 de abril, que a desenvolve.

CAPÍTULO III

SECCIÓN 1ª.- DO REXISTRO MUNICIPAL

Artigo 9º.-Rexistro Municipal de Animáis de Compañía e de Animais Potencialmente Perigosos.

1.-Créase o Rexistro Municipal de Animáis de compañía e de Animais Potencialmente Perigosos, composto de dúas seccións, a sección de Rexistro de Identificación de Animais de Compañía, na que se incluíran todólos cans, e a sección de Rexistro de identificación de Animais Potencialmente Perigosos, no que se inscribirán os animais potencialmente perigosos que teñan a súa residencia habitual no concello.

2.- O Rexistro Municipal de animais de compañía e de animais potencialmente perigosos terá un tratamento informatizado

3.-O Rexistro Municipal de Animáis de compañía e de animais Potencialmente Perigosos é un rexistro de carácter público, ó que terán acceso as Administracións Públicas e autoridades competentes, así como aquelas persoas físicas ou xurídicas que acrediten ter interese lexítimo no coñecemento dos datos obrantes no mesmo. En todo caso, o uso e tratamento dos datos contidos no Rexistro será conforme ó disposto na Lei Orgánica 15/1999, de protección de datos personáis.

SECCIÓN 2ª.- DA SECCIÓN DE REXISTRO DE IDENTIFICACIÓN DE ANIMAIS POTENCIALMENTE PERIGOSOS

Artigo 10º.- Nesta sección faráanse constar, de conformidade co disposto no artigo 4.2 do Decreto 90/2002, do 28 de febreiro, como mínimo, os seguintes datos:

Datos do animal:

- a) -Codigo identificador do animal e zona de aplicación.
- b) -Nome do animal.
- c) -Especie.
- d) -Raza (no caso de cans).
- e) -Sexo.
- f) -Características externas (Descrición da capa, tipo e cor da pel, etc.)
- g) -Data de nacemento do animal.
- h) -Aptitude (función do animal): compañía, garda, defensa, caza, etc...
- i) -Causa de inclusión no rexistro (sinalar supostos do artigo 2.2 do Decreto 90/2002).
- j) -Enderezo habitual do animal.
- k) -Data de adquisición do animal.
- l) -Forma de adquisición do animal (cria, doazón, traspaso, venda, outras: especificar).
- m) -Observacións.
- n) - Nome, dirección, número de colexiado e número de veterinario colaborador que realice a marcaxe.
- o) - Data na que se realiza a implantación da identificación e a entrega do documento ó propietario.
- p) - Data de alta no Rexistro.
- q) - D.N.I. do propietario do animal
- r) - Nome e Apelidos do propietario do animal.
- s) -Enderezo habitual do propietario do animal e Teléfonos de contacto.
- t) -Certificado sanitario, expedido por un veterinario, que acredite con periodicidade anual, a situación sanitaria do animal e a inexistencia de enfermidades ou síntomas que poidan facer potencialmente perigoso, así como unha certificación de que o animal carece de lesións o cicatrices que poideran estar relacionadas coa utilización do animal en pelexas ou outras actividades prohibidas.
- u) -Cartilla sanitaria actualizada nos tratamentos preceptivos e preventivos propios da especie e idade. Na cartilla sanitaria figurará a catalogación de animal potencialmente perigoso.
- v) - Licencia administrativa: número de licencia, data de expedición e concello de expedición
- x) -Datos do centro de adestramento, se fora o caso.
- y) -Incidentes de agresión, se fora o caso.

2.-A identificación definitiva con microchip dos animáis potencialmente perigosos é obrigatoria sen excepcións. A identificación definitiva con microchip de tódolos cans, independentemente da súa raza ou condición, será obrigatoria a partir do 2 de xullo de 2003, tal e como se recolle na disposición transitoria segunda do Decreto 90/2002, do 28 de febreiro.

Artigo 11º.-Inscrición no Rexistro.

1.-Os titulares da licencia administrativa están obrigados a efectuar a inscrición do animal no Rexistro Municipal do concello de residencia habitual do animal, no prazo de 15 días contados a partir da obtención da licencia, tal e como se recolle no artigo 6.2º da Lei 50/1999, do 23 de decembro, e no artigo 4.1º do Decreto 90/2002, do 28 de febreiro.

2.-Tamén será obrigatoria, a instancia do propietario, a inscrición do animal no Rexistro Municipal do

concello correspondente cando se efectúe o seu traslado dun concello a outro por período superior a tres meses.

3.-Conforme se dispon no artigo 4.3º do Decreto 90/2002, do 28 de febreiro, os datos recollidos no rexistro municipal serán remitidos á Consellería de Medio Ambiente, no prazo máximo de 15 días, contados desde o momento da inscrición dun animal potencialmente perigoso.

Artigo 12º.-Acreditación da inscrición no Rexistro Municipal de Animáis de Potencialmente Perigosos.

A inscrición no rexistro acreditarase mediante entrega dunha copia da resolución do expediente administrativo iniciado a solicitude do interesado, e mediante entrega dunha tarxeta acreditativa, tama ~~1/2~~ carnet, expedida polo concello, onde se fagan constar os seguintes datos:

-Número do microchip e data de alta do animal no rexistro municipal.

-Nome, especie, raza, sexo, capa e data de nacemento do animal.

-Enderezo do animal.

-Nome, apelidos do propietario.

-Licencia do propietario (número, data de expedición, concello).

-DNI do propietario.

SECCIÓN 3º.- DA SECCIÓN DE REXISTRO DE IDENTIFICACIÓN DE ANIMAIS DE COMPAÑÍA.

Artigo 13º.-Sección de Rexistro de Identificación de Animáis de Compañía (RIAC).

1.- A Sección de Rexistro de Identificación de Animais de Compañía nutrirase cos datos remitidos polo REGIAC, dependente da Consellería de Medio Ambiente, polos aportados polos propietarios, posuidores ou personas que asuman a responsabilidade, ou polos aportados polo veterinarios colaboradores.

2.-Cos datos contidos nesta Sección formarase, a data 31-12 de cada ano, o Censo ó que se refire o artigo 27º do Decreto 153/1998, do 2 de abril.

Artigo 14º.- Inscrición no Rexistro de Identificación de Animáis de Compañía (RIAC) .

1.- Os posuidores de animais da especie canina, así como aqueles doutras especies que no futuro determina a Consellería competente na materia, están obrigados a efectua-la inscrición do animal no Rexistro Municipal de Bóveda, no caso de residencia habitual do animal neste concello.

2.- A inscrición no Rexistro de animais de compañía efectuarase a instancia do interesado ou de oficio no seu caso, polo concello.

3.- Neste rexistro farase constar a información contida no apartado 5º do artigo 5 do Decreto 90/2002, do 28 de febreiro, da Comunidade Autónoma de Galicia.

SECCIÓN 4º.- DISPOSICIÓN COMUNS DAS SECCIÓNS DOS REXISTRO MUNICIPAL DE ANIMAIS DE COMPAÑÍA E POTENCIALMENTE PERIGOSOS

Artigo 15º.-Baixa no Rexistro Municipal de Animáis de Compañía e de Animais Potencialmente Perigosos.

1.-A baixa no Rexistro Municipal de Animáis de Compañía e de Animais Potencialmente Perigosos efectuarase a instancia do interesado, previa acreditación da morte do animal (esta última certificada por veterinario ou autoridade competente).

2.-Igualmente procederase á baixa no Rexistro no caso de traslado de residencia habitual do animal a municipio distinto, e así quede acreditado a instancia do interesado. Neste caso o propietario deberá dar de alta ó animal no novo concello de residencia se esta clasificado como potencialmente perigoso.

3.-A perda ou sustracción do animal, por un prazo superior a tres meses, considerarase baixa definitiva do animal no Rexistro.

4.-Farase constar no Rexistro como de titularidade municipal aqueles animais depositados no centro de recollida de animais vagabundos ou abandonados dependente do concello, como consecuencia da recollida dos mesmos da vía pública, que carezan de dono ou que sendo este identificado non o reclamase no prazo de 10 días do aviso efectuado, conforme o previsto no artigo 53 do Decreto 153/1998, do 2 de abril. Así mesmo, constarán como de titularidade municipal os que foran obxecto de decomiso definitivo ó propietario.

Artigo 16º.-Comunicacións do propietario de animal ó Rexistro Municipal de Animais de Compañía e de Animais Potencialmente Perigosos.

1.-O propietario do animal deberá comunicar ó Rexistro calquera variación dos datos que figuran nel, no prazo de 15 días desde que se producise a modificación.

2.-Deberá comunicarse ó rexistro municipal a venda, traspaso ou doazón do animal.

3.- Calesquera incidentes producidos por animais potencialmente perigosos ó longo da súa vida, coñecidos polas autoridades administrativas ou xudiciais, faranse constar na folla rexistral de cada animal, tal e como se recolle no artigo 6.4º da Lei 50/1999, do 23 de decembro. No caso de agresións recollerase, como mínimo, a seguinte información: data da denuncia, descrición dos feitos e consecuencias xurídicas.

4.- A sustracción ou perda do animal deberá ser comunicada polo titular do animal o Rexistro Municipal, no prazo máximo de 48 horas desde que se teña coñecemento destes feitos, tal e como se recolle no artigo 8.6º do RD 287/2002, do 22 de marzo.

5.-Os propietarios de animais potencialmente perigosos deberán comunicar ó Rexistro a realización de castración ou esterilización do animal, se isto se producise, remitindo copia da certificación veterinaria correspondente que acredite este feito.

CAPITULO IV

Artigo 17º.-Circulación e permanencia dun can potencialmente perigoso en vías públicas e locais.

1.-Os propietarios, criadores ou tedores deberán manter os animais que estean baixo a súa custodia en aiteitadas condicións hixiénico-sanitarias e cos coidados e atencións necesarios de acordo coas necesidades fisiolóxicas e características propias da especie ou raza do animal, en cumprimento da Lei 1/1993, do 13 de abril e do Decreto 153/1998, do 2 de abril, en concreto nos seus capítulos IV, VII e X.

2.-A presenza de animais potencialmente perigosos en lugares ou espazos públicos esixirá que a persoa que os conduza e controle leve consigo a licenza municipal e a certificación acreditativa da inscrición Animal no Rexistro Municipal de Animais Potencialmente Perigosos.

3.-Os cans potencialmente perigosos, en lugares e espazos públicos, deberán levar obrigatoriamente buceiro apropiado para a tipoloxía racial de cada animal.

4.-Os cans, potencialmente perigosos deberán ser conducidos e controlados con cadea ou correa non extensible de menos de 2 metros, sen que poida levarse máis dun destes cans por persoa.

CAPITULO V

Artigo 18º. Cans potencialmente perigosos abandonados ou vagabundos.

1.-A administración local é responsable da recollida e mantemento dos animais vagabundos ou abandonados, segundo se recolle no artigo 11.1º da Lei 1/1993, do 13 de abril, e no artigo 54º do Decreto 153/1998, do 2 de abril.

2.-Os animais recollidos serán trasladados e mantidos en centros de recollida de animais vagabundos ou abandonados autorizados e rexistrados. As instalacións destinadas a albergar cans potencialmente perigosos deberán reunir as medidas de seguridade necesarias para evitar as fuxidas sen producir danos os animais.

3.-Os prazos de estadía previstos serán os que se dan para todos os individuos da especie canina e que veñen reflectidos nos artigos 53, 57 e 58 do Decreto 153/1998, do 2 de abril.

4.-Estes animais poderán ser cedidos en adopción sempre e cando o novo propietario posúa a licenza administrativa correspondente, e o can supere as probas de socialización que demostren que o animal non é perigoso para a seguridade das persoas.

CAPÍTULO VI.-INFRACCIONS E SANCIONS.

Artigo 19º.-Infraccións.

1.-En materia de infraccións e sancións rexerá o disposto na Lei 50/1999, do 23 de decembro, sobre réxime xurídico da tenza de animais potencialmente perigosos e na Lei 1/1993, do 13 de abril, de protección de animais domésticos e salvaxes en cativeiro.

2.-As infraccións que se cometan contra o disposto nesta Ordenanza clasifícanse como moi graves, graves e leves.

3.-Terán a consideración de infraccións administrativas moi graves as previstas no artigo 13.1º da Lei 50/1999, do 23 de decembro, así como as establecidas no artigo 22º da Lei 1/1993, do 13 de abril,

4.-Terán a consideración de infraccións administrativas graves as previstas no artigo 13.2º da Lei 50/1999, do 23 de decembro, así como as establecidas no artigo 21º da Lei 1/1993, do 13 de abril.

5.-Son infraccións administrativas leves as previstas no artigo 13.4º da Lei 50/1999, do 23 de decembro, así como as establecidas no artigo 20º da Lei 1/1993, do 13 de abril.

Artigo 20º.-Sancións.

1.-As infraccións tipificadas no artigo anterior serán sancionadas con multas coas contías fixadas no artigo 13.5º da Lei 50/1999, do 23 de decembro, e no artigo 24º da Lei 1/1993, do 13 de abril.

2.-En todo caso, as infraccións graves e moi graves tipificadas no artigo anterior desta Ordenanza, poderán levar aparelladas como sancións accesorias a confiscación, decomiso, esterilización ou sacrificio dos animais potencialmente perigosos, a clausura do establecemento e a suspensión temporal ou definitiva da licenza de animais potencialmente perigosos ou do certificado de capacitación do adestrador.

Artigo 21º.-Responsable.

Considéranse responsables das infraccións os que por acción ou omisión participaran na comisión das mesmas, o propietario ou tenedor dos animais ou, no seu caso, o titular do establecemento, local ou medio de transporte no que se produzan os feitos, e neste último suposto, asemade, o encargado do transporte.

Artigo 22º.-Procedemento sancionador.

O procedemento sancionador aplicable rexerá polo establecido na Lei 50/1999, do 23 de decembro, a Lei 1/1993, do 13 de abril, así como a Lei 30/3992. do 26 de novembro e as normas que as desenvolven.

Artigo 23º.-Exercicio da Potestade Sancionadora.

1.-Os órganos competentes para sancionar, de acordo cos artigos 24.2º da Lei 1/1993, do 13 de abril, serán:

a) Por infraccións leves, o Alcalde.

b) Por infraccións graves, o Director Xeral de Conservación da Natureza da Consellería de Medio Ambiente.

c) Por infraccións moi graves, o Conselleiro de Medio Ambiente.

2.- A incoación e tramitación dos expedientes polas infraccións tipificadas como leves correspondenlle ó Concello. Non obstante, o Alcalde pondrá en coñecemento, de xeito que faga fe, do Director Xeral de Conservación da Natureza da Consellería de Medio Ambiente, toda acción ou omisión que poida ser tipificable como infracción grave ou moi grave.

3.-Cando as circunstancias de perigo así o aconsellen, o Alcalde poderá proceder á retirada ou custodia dun animal potencialmente perigoso, a cargo do propietario, como medida de carácter provisional durante a tramitación dun expediente sancionador.

DISPOSICIÓN FINAL.

A presente Ordenanza entrará en vigor coa súa publicación íntegra no Boletín Oficial da provincia de Lugo, continuando en vigor ata a súa derogación polo Concello.